

Akilerartarnermut Atugarsissaarnermullu Isumalioqatigiissitap akilerartarnermut atugarissaarnermullu immikkoortunut innersuussutaanik aallaaveqartumik aqqissuusseqqinnernik suliaqarnernik aallartitsinissamik Naalakkersuisut peqquneqarnissaannut Inatsisartuni aalajangiiffigissatut siunnersuut. Sulineq 2021 immikkoortunik ilanngussaq 1-mi taaneqartunik aallaaveqassaaq. Sulineq 2021 naatinnagu naammassineqareersimassaaq

Inatsisartunut ilaasortamit Múte B. Egedemit saqqummiunneqartoq

pillugu

Aningaasaqarnermut Akilerartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Aningaasaqarnermut Akilerartarnermullu Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Múte B. Egede, Inuit Ataqtigiit, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Malene V. Rasmussen, Demokraatit
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Jens Napaattooq, Partii Naleraq

UKA 2020-imi ulloq 4. november 2020 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Akilerartarnermut Atugarsissaarnermullu Isumalioqatigiissitap akilerartarnermut atugarissaarnermullu immikkoortunut innersuussutaanik aallaaveqartumik aqqissuusseqqinnernik suliaqarnernik aallartitsinissamik Naalakkersuisut siunnersuutikkut peqquneqarput. Sulineq 2021-p naannginnerani naammassineqareersimassaaq.

Suliassaqarfiit qitiutinneqartussat siunnersuummut ilanngussaq 1-imi taaneqarput.

2. Siunnersuutip Inatsisartunit siullermeerneqarnera

Siunnersuutikkut anguniarneqartut partiinit arlalinnit siullermeerinninnermi taparserneqarput.

Isertitatigut naligiinnginneq, arlallit malillugit annertusiartuinnarsimasoq¹, kiisalu akunnattumik isertitallit unammilligassaat oqallinnermi sammeneqarput. Tamatuma saniatigut amerlane-rusut sulilernissaannut iliuuseqarnissamik pisariaqartitsinnermut ilanngullugu siusissuklut iliuuseqarnissap pingaaruteqassusia kiisalu atugarissaarnissamut akissaqarumalluni siuariartortitsinissap pingaaruteqassusia oqaluuserineqarput.

Attassinissamut Siuariartortitsinissamullu pilersaarut 2016-imeersoq kiisalu Akileraartarnermut Atugarissaarnermullu Isumalioqatigiissitap isumaliutissiissutaa aallaavigalugu kaammattuutit naammassineqareersut siullermeerinninnermi Naalakkersuisunit erseqqissaatigineqarput.

Aningaasaqarnermut Naalakkersuisoqarfiup Aningaasaqarnermut Siunnersuisooqatigiit peqatigalugit attassinissamut periuttip nutarterneranik suliaqarnini maanna naammassingajaleraa, taannalu Attassinissamut Siuariartortitsinissamullu pilersaarutip malitseqartinneqarneranut atatillugu patajaannerusumik sakkussaasoq Naalakkersut aamma paasissutissiissutigaat.

3. Ataatsimiititaliap siunnersuummik suliarinninnera

Isumaginninnikkut suliffissaqartitsiniarnikkullu maanna suliniuteqarniarneq suli unammillernartoqarmat Aningaasaqarnermut Siunnersuisooqatigiit 2019-imi nalunaarusiaat innersuussutigalugu ataatsimiititaliamit oqaatigineqassaaq.

Aaqqissuusseqinnissami siunnersuutigineqartumi suliassaqarfiit qitiutinneqartussat siunnersuuteqartup ilanngussaq 1-imi siunnersuuteqarfigai. Suliassaqarfiit qitiutinneqartussat taakku soqutiginarlutut sulissutigeqqissallugillu naleqquttutut ataatsimiititaliamit isigineqarput.

Tamatuma peqatigisaanik Akileraartarnermut Atugarissaarnermullu Isumalioqatigiissitap isumaliutissiissuteqarnerata kingorna iliutit aallartinneqareersut Naalakkersuisunillu siullermeerinninnermi nassuiaatigineqartut ataatsimiititaliamit akuersaarneqarput.

Attassisinnaanermut periuseq nutaaq pitsanngorsagaq, Naalakkersuisunit siullermeerinninnermi taaneqartoq, ataatsimiititaliamit soqutiginarneqarpoq, taamaattumillu periuseq qanoq imaqaarnerisooq aappassaaneerinninnissamut akissuteqaammini erseqqinnerusumik itisileqqullugu Naalakkersuisut ataatsimiititaliamit **qinnuigineqarput**. Tassunga atatillugu attassisinnaanermut periuttip nutaap pitsanngorsakkap qanoq patajaannerusumik sakkussaasinnaanera paasissutissiissutigineqassasoq ataatsimiititaliamit aamma kissaatigineqarpoq, tamatumani ataatsimik arlalinnilluunniit assersuusiornissaq pitsaasuussaaq.

¹ Naatsorsueqqissaartarfimmilli kisitsisit malillugit naligiinnginneq (Gini-koefficienti taamatullu 80/20 ratio atorlugit uuttortarlugu) 2017-imit appariartorpoq aammalu 2012-ip kingorna 2019-imi appasinnerpaamiilluni. Ukiulli tulleriat arlallit ingerlanerini naligiinnginneq annertusiartorsimavoq.

Siuliani allassimasut tunngavigalugit ataatsimiititaliaq isumaqatigiittoq allannguutissatut siunnersuummik saqqummiussivoq. Takuuk imm. 5-imi ataatsimiititaliap inassuteqaatai.

4. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tamanna naapertorlugu siunnersuutip piviusunngortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Aaqqissuusseqqinissamut siunnersuummik suliaqarneq AC-it marluk-pingasut ukiumi ataatsimi sulinerannik, tassa 1-1,5 mio. kr.-it missaannik, naleqartussatut siunnersuuteqartumit tagginneqarpoq. Ataatsimiititaliaq tamatumunnga oqaaseqaatissaqanngilaq.


Allannguutissatut siunnersuummut aningaasartuutissat siunnersuutaaqqaartumi killiliunneqartut iluiniissinnaasutut naatsorsuutigineqarmata ataatsimiititaliamit oqaatigineqassaaq.

5. Ataatsimiititaliap inassuteqaata


Ataatsimiititaliaq **isumaqatigiittoq** allannguutissatut siunnersuummik imaattumik saqqummiussivoq:

Attassinissamut Siuariartortitsinissamullu pilersaarummik suliaqarnerup ingerlaqqinnerani suliaasaqarfiit siunnersuutaaqqaartumut ilanngussaq 1-imi nalunaarneqartut ilannguteqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Ilanngussaq 1 ilanngunneqarpoq.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Hermann Berthelsen
Siulittaasoq



Mute B. Egede
Siulittaasup tullia




Mala Høy Kuko




Aleqa Hammond



Malene V. Rasmussen



Peter Olsen



Jens Napaattooq